



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com


TAPAK 6

Yangia anidakangma : Tir Yimiyim

tiryimiyim@aolima

tir yimiyim

TAPAK 7



Defence Minister Rajnath-i Arunachal nung forward posts semdang



China-i telescope tasen ka amenoktsü sentong aliba sangdong

VOL. XXI NO. 18 (ADOK 18) DIMAPUR YANGTEPNÜ (THURSDAY) MONGPUTENI (OCTOBER) 26, 2023 ₹ 5.00

Congress-i Amit Shah aser Himanta Sarma anema ken o benok

New Delhi, October 25, 2023 (Agencies): National Congress (INC)-i October 25 nū Election Commission of India tsüngdang Amit Shah aser Himanta Biswa Sarma anema ken o benokogo.

“Union Home Minister Amit Shah aser Assam Chief Minister Himanta Biswa Sarma nati temulung raksatsüba aser telemsa adokdaksüba onüktem jembiba atema ken o benokogo. Parnoki kuli kecha melii tai tongloksüogo aser iba ajanga elections agidak kongshitsü. ECI-i item ken o agizüka mapa inyaksü imlar” ta Salman Khurshid-i ashi.

“Kuli maliba o jembiba nung lendong tulu lir, iba ajanga

election tensa tamajungba kümdaktsütsü akok. Onoki iba atema ashishir aser Election Commission dang mapa inyaksü ken o benoker. Item amala nungshilem magidaktsüsüla aser Election Commission-i lemtet aika agitsü lir” ta Khurshid-isa ashi.

“Onoki tanü Election Commission tsüngdang memoranda 8 benokogo. Mezüngbubaji Union Home Minister Amit Shah-i Chattishgarh nung jembiba aser tanabubaji Himanta Biswa Sarma-i October 18 nung Chattishgarh nungsa jembiba lir” ta Congress lennir Jairam Ramesh-isa ashi.

Manipur sorkari relief camp nung alir nem Rs 1,000 agütsür

Imphal, October 25, 2023 (Agencies): Manipur sorkari October 24 nū relief camps nung jenoka alir nisung shia nem Rs 1,000 teyari agütsüogo.

“District commissioner tem ajanga relief camps nung jenoka alir shia nem Rs 1,000 teyari agütsüogo. Asükwa tonga arudang pei talidak toktsür aoertem süoshi aser nija osettem alitsü atema senotsü teyari

agütsür” ta Manipur Chief Minister N Biren Singh-i metetdaksü.

Relief camps nung jenoka lir nisung 61, 387 nem iba teyari agütsütsü atema District commissioner tem Rs 6.138 crore agütsüogo, ta paisa ashi.

“State sorkari kin mereprangi takoksa ajurur ajak nem teyari agütsütsü” ta CM Biren Singh-isa ashi.

PM Modi-i Jan 22 nū Ram Temple lapoktsütsü



October 25, 2023 nū Ram Janmabhoomi Teerth Kshetra Trust ketdangpurtemi PM Modi den ajurutepdang agiba noksa angur.

New Delhi, October 25, 2023 (Agencies): Prime Minister Narendra Modi-i January 22, 2024 nū Ram Temple lapoktsütsü.

Ram Janmabhoomi Teerth Kshetra Trust-i tanü tekülem ki lapoktsüba sentong nung pa adentsü jaok ta Prime Minister Modi-i ashiba sülen iba osang temai adokog.

Prime Minister-i Ayodhya nung Ram Mandir lapoktsüsüba jaokba pelashishia agizükogo.

Iba otsüsütsü sentong nung adentsüba ya kangasa tia taka lir, ta PM Modi-isa ashi.

Ayodhya nung Ram Mandir ground floor taküm December

ita renemtsü, ta Ram Temple Construction Committee Chairperson Nripendra Mishra-i taoba mapang shia liasü.

PM Modi-i January 22, 2024 anügdang 12:30 ako nung Ram Temple lapoktsütsü ta osang ajanga ashi.

August 5, 2020 nū Prime Minister Modi-i Ayodhya nung Ram Temple yanglutsü atema lung azüngja liasü.

Ayodhya nung aliba Ram Mandir nung Lord Ram indang kürakyanglu January 22, 2024 nū enoktsü ta tanü Sri Ram Janambhoomi Trust General Secretary Champat Rai-ia metetdaksüogo.

Nagaland indang ali New Delhi-i bener aoer



October 25, 2023 nū Indira Gandhi Stadium, Kohima nung NRE and NSDMA Advisor Z Nyusietho Nyuthe aser Home Commissioner, Abhijit Sinha, IAS na den tangartemi Amrit Kalash Yatra apusoa yokdang agiba noksa ka angur.

Kohima, October 25, 2023 (DIPR): October 25, 2023 nū Meri Maati Meri Desh kübok Amrit Kalash Yatra indang send-off programme agiogo.

Iba sentong ya Indira Gandhi Stadium, Kohima nung agi NRE and NSDMA Advisor Z Nyusietho Nyuthe-i tetushi süa jaoker ka ama shilem agi.

New Delhi nung National Level Event atema Nagaland nungi volunteers-i Amrit Kalash (Nagaland indang ali abenba chibo) bener aoba sentong nung adenba atema kanga pelar ta Nyusietho Nyuthe-i ashi.

Meri Maati Mera Desh campaign kübok Amrit Kalash Yatra ya March 12, 2021 nungi tenzükba Azadi Ka Amrit Mahotsav tembangba sentong lir. Iba ya India nüjiso ngur küm 75 abensaba nüngtem nung benjunger, ta Advisor Nyuthe-i ashi.

“Azadi Ka Amrit Mahotsav

ajanga linük nüjiso angurtemi inyakba ajiteter aser Meri Maati Mera Desh ajanga iba benjung tembangtsü. Iba sentong ajanga Veers & Viranganas nem tetushi agütsür” ta Nyuthe-isa shisem.

October 30, 2023 nū New Delhi nung iba benjung tembangtsü, ta paisa ashi.

“Meri Maati Mera Desh Campaign kübok Amrit Kalash Yatra ya March 2021 nung tenzükba Azadi Ka Amrit Mahotsav tembangba sentong lir” ta Home Commissioner, Abhijit Sinha, IAS-ia ashi.

“Meri Maati Mera Desh campaign ya August 2023 nung tenzük aser shilem ana lemsar agir. Mezüngbuba shilem nung tesem balala aser talisa yimtsüngtem nung Memorial plaques (Shilaphalakam) yanglu aser item nung tasütaitertem tenüng zülua lir. Linük sensotemisa ali amer ‘Panch Pran’ Pledge agiogo” ta Abhijit-

isa ashi.

“Iba sentong nung shilem ka ama süngdongtem temogo. Iba mapa ya yimtsüng 1,003 nung inyak aser Amrit Vatika 1,249 adok. Tanabuba shilem nung Amrit Kalash Yatra amondang yimtsüngtem nungi ali benden aer itemji Blocks dangi yok. Idak nung jagi Kohima-i bener aru aser yang nungi volunteers 74-i New Delhi-i bener aotsü. October 30 nū atsü ka (Amrit Vatika) nung ali ajak bendentsü” ta Abhijit-isa metetdaksü.

Amrit Kalash Yatra ajanga nüboritemi linük nüjiso atema rarartem nem tetushi agütsütsü aser kati ka akhümtsübutepa longjema alitsü tangatetba angutsü imlar, ta paisa ashi.

Iba sentong nung Youth Resources & Sports Director Kethosituo Sekhose-ia youth volunteers dang pelaba metetdaksü.

2024 LS elections matongdang ULFA-i Centre den tenangzüktep agitsü

Guwahati, October 25, 2023 (Agencies): Bodbarnü United Liberation Front of Asom (Pro-talk faction)-i Centre sorkar den draft agreement agitsü aliba renemogo aser iba ajanga Assam nung küm 40 tashi telungpur maparen inyaka aruba anentsü.

Olemtep nung adenba ULFA-I teloki 2010 küm yimjung olemtep nung aden aser iba jagi state sorkari chairman Arabindaa Rajkhowa aser vice chairman Pradip Gogoi na dena lennir ajak tepuokdak nungi chiok.

“Onoki 2024 Lok Sabha elections matongdang Centre sorkar den yimjung tenangzüktep ka agitsü imlar” ta ULFA (Pro-talk) general secretary Anup

Chetia-i osangbener dang ashi.

“Onoki Assam nung lisopurtem nem assembly 94 aser Lok Sabha menden 8 mekazüka yutsütsü shidangogo” ta Chetia-isa ashi.

“Onokisa National Register of Citizens (NRC) nung cut-off-year 1950 yur inyaksü onük ka benokogo” ta paisa ashi.

“2011 küm Centre sorkar den olemtepba sülen peace interlocutor AK Mishra-i Rongali Bihu matongdang draft ka agitsü saka iba nung lisopurtem yimtenren aser temzüng kümzüka ayutsü indang tejangja shia maliasü. Tanü General Council senden nung onoki draft agreement indang lemsatep aser onük kar bendenlokba aser kar

agianba sülen tatembang draft ka renemogo” ta Chetia-isa metetdaksü.

“Onoki Centre sorkar dang political aser constitutional safeguard enoksemtü mepishir. Onoki bendanger dang nungi lisopurtem kümzüka ayutsü atema rara anungji yimtenren temeten ajanga dang onok kümzüka ayutsü” ta paisa ashi.

Working Council aser Central Executive Council ajanga renemba draft General Council-i agizükogo aser Centre o state sorkar den tenangzüktep nung sign süteptsü atema Central Executive Council nem tashi ajak agitsür ta ULFA (Pro-Talk faction)-i metetdaksü.

Mkg. nung District Scout Masters & Guides Captains Basic Course sentong agi



Mokokchung, Mongputeni/October 25(TYO): October 19 nü nungi October 26 nü tashi Mokokchung District Scout Masters & Guides Captains Basic Course sentong ka 173 CRPF Bn DEF Camp Mokokchung nung kadagi.

October 25 aonung Grand Campfire Sentong Grand Campfire Chief Superintendent of Police Mokokchung Manoj Kumar IPS-i jembidang iba ama course akaba ajanga linük nung temelenshi tulu bener arutsür, anungji iba basic course training nung Mokokchung nungi Scout Masters aser Guides Captains-tem aika angudang kanga dang pelarta ashi.

Manoj Kumar IPS-isa alima linük 216 nung Scout & Guides tenteta lir, India nunga Bharat

Scouts & Guides Movement nung nübu million 5 tashi dena lir, Nagaland nung Mokokchung district-i tama iba Scouts & Guides Movement ya tentet aser joko 2025 kümbo küm 75 ajungba jubilee amongtsüba lir, anungji jubilee amongdangjibo iba Scouts & Guides Movement nübu aika anioker temelenshi tulu nung longso longsoa amongtsü asoshi inyanganta Mokokchung District Scout Masters & Guides Captains ayongzüka jembidi.

Kasa sentong nung Mokokchung District Bharat Scout & Guides Chief Commissioner & District Education Officer Wt.Sentinenla-i tajungshi o jembidi aser District Organising Committee (Guide)

Mokokchung Wt.Tovili Wati-i tepela o jembidi aser iba sentong Wt.Sentimenla Asst.Dist. Organising Committee(Guide) Mokokchung ketdangsuba nung agi aser sentong nung Scout Masters & Guides Captains-temi kenten menü aser asaya balala aiba ajanga iba sentong kanga dang acha keta agia liasü aser sentong nung Ao Senden Tir Wb.Chubawati, 12 Assam Rifle Commandant Mokokchung Col.Rahul Gurung, Kirti Chakra nungera dena liasü.

October 26 nü iba Mokokchung District Scout Masters & Guides Captains Basic Course sentong ya National Anthem tena linük wako atsüzüka tembangtsü sentong renema lir.

Electoral Roll indang Draft Publication sentong alitsü

Dimapur, Mongputeni/Oct. 25 (TYO): Deputy Commissioner aser Electoral Registration Officer, Kohima, Rhosiotho Nguori, NCS ajanga sangdong ka nung ashiba agi, Special Summary Revision of Photo Electoral Roll atema Draft Publication sentong ya October 27, 2023 anepdang 11:00 ako nungi tenzüka Deputy

Commissioner, Kohima indang Conference Hall nung agitsü. Iba sentong nung Political Party ajak arua adentsü ayongzüker, kechiaser iba sentong nung recognised political party tem nem Copies of Draft Roll (hard copy ka aser and soft copy ka) agütsütsü, ta sangdong ajangasa ashi.

Nagaland Excise Department-i temesepba mozü aser yi apu



Dimapur, Mongputeni/Oct. 25 (TYO): Nagaland Excise Department ajanga state tesem ajungalen maneni NLTP Act 1989 mapa kumdaktsütsü meranga inyaka arur aser district ajunga nung ki aser tesem balala meita oa arudagi.

Iba mapang NLTP Act kübok aibelenba ken o 120 zülüok aser nisung 135 pua iba Act indang section balala kübok ken o benok. Kasa mapang Indian Made Foreign Liquor (IMFL) aser beer cases 286 aser bottle 496 den Country Liquor litres 1104 apu, ta sangdong ka ajanga ashi.

Kasa mapang Heroin gram 500 apuba indang NDPS ken o ka Court of Law nung zülüokogo. NLTP Act mapa kuma amshitsü asoshi State Excise Department ya Nodal Department lir asr NLTP Act 1989 kübok aibelener nem temerenshi agütsütsü Director of Prohibition dak tashi lir, anungji enforcement agencies ajunga dang department den amteper iba Act kübok takok ngua maparen balala inyaktsü ayongzüker, ta Commissioner of Excise & Director of Prohibition, Nagaland, H. Atokhe Aye, NCS ajanga sangdong ka nung ashi.

ECI ajanga Special Summary Revision indang metetdaktsü

Sl. No.	Revision Activities	Schedule
1.	Publication of Integrated draft electoral roll	27.10.2023 (Friday)
2.	Period of filing claims & objections	From 27.10.2023 (Friday) to 09.12.2023 (Saturday)
3.	Special campaign dates	03.11.2023 (Friday) & 04.11.2023 (Saturday) and 17.11.2023 (Friday) & 18.11.2023 (Saturday)
4.	Disposal of claims & objections	By 26.12.2023 (Tuesday)
5.	(i) Checking of health parameters and obtaining Commission's permission for final publication (ii) Updating database and printing of supplements	By 01.01.2024 (Monday)
6.	Final publication of electoral roll	10.01.2024 (Wednesday)

Dimapur, Mongputeni/Oct. 25 (TYO): Election Commission of India ajanga Special Summary Revision of Photo Electoral Rolls atema qualifying date ya 01.01.2024 asütsü totuyuba agütsüogo.

Special Summary Revision ya January 1, 2024 ya qualifying date ama agitsü aser iba sülen April 1, July 1 aser October 1 nung electoral roll final publication asütsü.

Tang tagidak revision asoshi January 1, 2024 aser iba sülen April 1, July 1 aser October 1, 2024 anogotem qualifying dates nung tenüng zülüoktsü asoshi temsüa akumer temi electoral rolle indang draft publication anogo nungi tenzüka Form -6 ya jelia agütsütettsü.

Qualifying date January 1, 2024

dak sendakba nung application agütsüba ya tamale shia aliba ama inyaktsü aser electoral roll ya final publication nung adoktsü.

Kasa küm qualifying dates atongtepa asem dak sendakba nung forms/claims jelia agizükbatem, Special Summary Revision mapang aser iba sülen update asübatem, Electoral Registration Officer (ERO) ajanga inyaktsü.

Forms amshitsüyim yamai alitsü:-

- i. Form 6 - Iba form ya voter/elector tasen asoshi alitsü.
- ii. Form 6B - Iba form ya electoral roll jangjashitsü asoshi voluntary basis nung Aadhar number agütsüba shiti.
- iii. Form 7 - Iba form ya tang aliba electoral roll nung

tenüng inoktsü/indoktsü asoshi application form.

iv. Form 8 - Iba form ya tang aliba electoral roll nung ki melenshiba/tenüng melenshiba/EPIC melenba/marking of PwD atema alitsü.

Nüburtemi tekalen shia aliba Forms tem pei Booth Level Officer mesüra AERO aser ERO nem agütsütettsü.

Forms ya ECI aser CEO indang website nungi download sütettsü. Applications ya www.voters.eci.gov.in nunga agütsütettsü (koba ECI aser CEO indang website nung agüja lir) mesüra mobile app - VHA (voter helpline app) nunga agütsütettsü, koba Google Play Store aser Apple App Store nungi download asütsü akok.

Mon district nung Election Observer tem yoka lir



Dimapur, Mongputeni/Oct. 25 (TYO): 14th Nagaland Legislative Assembly atema 43 Tapi Assembly Constituency nung Bye Election agitsü aliba dak sendakba nung Election Commission of India (ECI) ajanga Mon district asoshi shilem balala atema Election Observers yokogo, ta Deputy Commissioner aser District Election Officer, Mon, Ajit Kumar Verma, IAS ajanga sangdong ka nung ashi.

Bye-Election tesunep aser timi shidak agitsü nükjidong nung parnok nübu ya shim. Item Election Observers yamai alitsü:-

1. General Observer, Patibandia Ashok Babu, IAS, Contact No. 6009361378 (Walo Guest

- House)
 2. Expenditure Observer, Ashutosh Yadav, IRAS, Contact No. 6009399434 (Walo Guest House)
 3. Police Observer, K. Parashurama, IPS, Contact No. 6009395303 (BRO Guest House)
- Item Election Observers ya October 19, 2023 nü Mon tonga aruogo aser parnok ya shia aliba tesem nung lir.

Anungji election dak sendakba nung aibelen ainyaksangshiba osang agütsüner lira, mesüra election dak sendakba metetpelatsü lira parnok den anepdang 10:00 ako nungi 11:00 ako tsüngta agüja aliba contact number ajanga tongteprateptsü akok, ta sangdong ajanga ashi.



Yimkhiung Tribal Council (YTC) pur Platinum Jubilee tembangba sentong October 24, 2023 nü Shamator public ground nung agia liasü. Iba sentong nung tesemdang tongti ka ama Minister, PWD Housing & Mechanical, Government of Nagaland, P. Bashangmongba Chang liasü.

Kibong shia nung tetsüti nem sen 10,000 agütsütsü: Ashok Gehlot



October 25, 2023 nü Jhunjhunu nung Rajasthan Chief Minister Ashok Gehlot (abelen) aser Congress lenir Priyanka Gandhi Vadra (abelen nungi tanabuba) den party lenirtem election nüboyim sentong ka nung tangokba noksa nung angur.

Jhunjhunu, Mongputeni/October 25 (Agencies): Rajasthan nung assembly election agitsü joko ita ka shi dang lia Bodhbarnü Chief Minister, Ashok Gehlot-i, Congress-i maneni takok ngura küm shia kibong nung tetsütitem nem senotsü teyari sen meyrjang terer agütsütsü, ta metetdaksü.

'Grah Laxmi Guarantee' kübok kibong nung tetsüti nem küm shia sen meyrjang ter (10,000) agütsütsü; senji shilem ana mesüra asem lemsar asütsütsü, ta pai metetdaksü.

Jhunjhunu jila nung election nüboyim sentong ka nung jembidang Chief Minister-isa, party-i maneni takok ngura sorkari kibong crore 1.5 nem

sorochocka gas cylinder sen 500 agi dang agütsütsü, ta nangzük.

Iba sentong nungji Congress General Secretary, Priyanka Gandhi Vadra-a liasü.

Kasa sentong nung jembidang Priyanka Gandhi-i, "Jhunjhunu ya taküm bendanga agütsürtem lima lir, kechiyong iba tesem nungi Indian Army nung tenzüker aikati linük atema taküm bendanga agütsüogo. Ajisüaka sorkari Agniveer scheme benokba ajanga lanurtem mangdang samatsüogo; kechiyong iba scheme kübok lanur kati küm pezü dang tenzüktetsü," ta ashi.

Laisa, "Indian Army nung adentsü atema lanurtem aikati anepdang züngia moapu-i oa

training agia liasü, saka tangbo parnoki Army nung adentsü atema tenüng magütsür. Sorkari linük nung reju ajak kanga tongtibang mesüi kümdaktsüogo," ta ashi

Congress sorkari nangzükba dak sendakba nung BJP MLA aser Opposition Lenir, Rajendra Rathore-i, "Item tenangzükba ajanga election osang sangdongba sülen Congress-i tajangzük kecha mangutsü. Parnoki atangji tetsürtem nem tajangzük agütsünüra tamalen nungi sangdongtsüla liasü," ta ashi.

Assembly menden 200 aliba state nung November 25 nü election agitsü aser December 3 nü vote zünga election osang sangdongtsü.

Ram tekülem ki semzükba sentong nung adentsü PM Modi jaok

New Delhi, October 25 (Agencies): Ayodhya nung Ram tekülem ki sangküm January 22 nü semzüksü; iba sentong nung adentsü atema Shri Ram Janmbhoomi Trust-i Ato kilonser, Narendra Modi nem tejaokba shidi agütsüogo.

Sri Ram Janmbhoomi Trust General Secretary, Champat Rai-i Ato kilonser ajurua pa dang January 22, 2024 nü Uttar Pradesh kübok Ayodhya nung Ram tekülem ki nung Ram süngyanglu semzüksü, ta metetdaksü.

Tesülen Modi-i X ajanga, "Jai Siya Ram! Shri Ram

Janmbhoomi Teerth Kshetra Trust nung ketdangpurtem ozü kidangi arua ni ajuruogo. Ram tekülem ki semzükba sentong nung adentsü atema pai ni Ayodhya-i jaokogo. Ni kanga moaogo. Kü akümla mapang nung iba sentong ni kulisüa angutsü," ta metetdaksü.

Modi-isa Sri Ram Janmbhoomi Trust nung ketdangpurtemi pa nem tejaokba shidi agütsüdang tangokba noksa-a ka lemsatop.

Rashtriya Swayamsevak Sangh (RSS) tongti, Mohan

Bhagwat-i, sangküm January 22 nü Ayodhya nung Ram süngyanglu inoktsü, anungji iba anogomong nung linük tesem balala nung aliba tekülem kidang sentong ayongzükba benjungtepang, ta metetdaksüba sülen anogo ka lir Trust-i iba sentong nung adentsü atema Modi jaoker.

Ram Lalla süngyanglu semzükba sentongji January 14 nungi tenzüka anogo 10 nü külemküja agitsü, ta taküm June ita nung Ram tekülem ki construction committee chairman, Nripendra Mishra-i metetdakja liasü.



October 25, 2023 nü Gorakhpur nung matamabensar tanurtem nem teyari oset balala lemstüba sentong nung Uttar Pradesh Chief Minister, Yogi Adityanath (ajichilen) adenba noksa nung angur. Chief Minister-isa smart classrooms nung ICT labs semzüksüba den külemi school aika nung Block Resource Centre facilities semzüksü.

Israel rara tuluba kümra India nunger aika kongshitsü: Omar Abdullah

Srinagar, Mongputeni/October 25 (Agencies): National Conference lenir, Omar Abdullah-i, Israel aser Gaza nung rara ya tuluba kümra tanga tesem nunga prokshira Middle East nung mapa inyaker India nunger aika kongshia timtemtsü, ta metetdaksü.

Srinagar nung aliba party headquarters nung osangbenertem den jembidang taoba mapang Jammu & Kashmir nung Chief Minister, Omar Abdullah-i, "Iba rara ya manenra aser tuluba kümra atangji asenoka (India nunger) kongshitsü. Iba region nung mapa inyaker teimtiba alibaji asen sensotem lir. Iba rara ya Gaza aden-a prokshira asen nüburtem aika kongshitsü," ta ashi.

"Ibayongji onoki iba rara ya anendaktsüner, bomb amshia amakba ya anentsüla. United Nations (UN) aser tanga linüktemi tim teinyaktsü inyaktsüla. Linük balala atema parnoki temzüng kasa dang amshitsüla," ta National Conference lenirisa metetdaksü.

Tang rara atema UN-i ola madoker asü?, ta asüngdangba langzüdang pai, UN-i Gaza nung meimchirtem timtemba atema

jembio, ajisüaka parnoki iba ya süoki ia magir, ta ashi.

"UN-i ola madoker masü, saka tia maka parnoki jembiba amaji iba ya süoki ia magir. UN-i yangji (Gaza) meimchirtem timtemba atema jembir, saka US, UK aser tanga linüktemi Israel pusemer, ibayongji UN-i inyaktetba kuli onoki mangur," ta pai ashi.

Abdullah-isa testüiba hopta ana tashi Srinagar nung aliba Jama Masjid nung Muslim nungertem Hokolbarnü sarasadem agitsü temelaba magütsüba atema pai J&K administration aitsü.

"Hopta pezü tejaklen nenoki (sorkar) tensa kanga junga kümogo ta jembio, anungji nenoki pa (Mirwaiz Mohammad Umar Farooq) nokdangtsü menüngdak. Ajisüaka tesüiba hopta ana tashi Jamia Masjid nung Hokolbarnü sarasadem agitsü memelar aser Mirwaiz kidang nungi mayazükdaksür," ta metetdaksü.

"Nenoki alima dang tensa tajungba kümogo ta sayuner. Yamaji süra Jama Masjid nung sarasadem agitsü temelaba agüjang aser Mirwaiz anema tenokdangba agienang," ta pai ashi.



October 25, 2023 nü United Nations Security Council (UNSC) nung India Deputy Permanent Representative (DPR) to United Nations Ambassador, R Ravindra-i jembidang tangokba noksa nung angur.

India-i Palestine nunger nem maneni teyari agütsütsü: India

New Delhi, October 25 (Agencies): Bodhbarnü India nunger Deputy Permanent Representative (DPR) to United Nations Ambassador, R Ravindra-i, India-i maneni Gaza Strip nung aliba Palestine nunger dangi teyari yoktsü, ta metetdaksü.

Paisa, India-i mozü, chiyungtsü aser teyari oset balala touzük ton 38 Palestine nunger dangi yokogo, aser ano maneni yoktsü, ta metetdaksü.

UN Security Council (UNSC) nung Israel-Hamas rara dak sendakba onük jembidang Ambassador-i, "Onoki terenlok tsütsü partnership nung ajemdaker Palestine nunger maneni yaritsü; iba partnership kübok health, shisaliok, tetsürtem nem tashi agütsüba, entrepreneurship aser information technology sectors densema lir. Tang ama tensa mapang ka nung India-i Palestine nunger nem teyari maneni agütsütsü," ta metetdaksü.

Amongnü India-i IAF indang tayimtsü ka nung mozü ton 6.5 den tanga teyari oset balala ton 32 Palestine nunger dangi yoka liasü.

Tensa tamajungba akümba aser Israel o Hamas na tsüngda raraba ajanga civilian aika asüba atema tebilemstü kaa Ravindra-i, "October 7 nü kiralongrartemi Israel amakbaji taoksatsüba aser onokia ibaji aitsür. Tai maket takoksa angurtem aser parnok kibongtem den mangyim jashi lemsatepba aser sarasademtsüba osang lemsateper mezünpur rongnung ozü Ato kilonser (Narendra Modi) densema liasü. Iba ama tensa ka nung onoki Israel den tejashi lemsatop. Takoksa angur kibongtem den onoki mangyim jashi lemsateper aser yirua alirtem tekeraba nung anepjang ta sarasademtsür," ta metetdaksü.

"Iba rara nung civilian asüba ya süoki ia agir aser tebilemstü katsür. Telok ajaki civilian; talisa tetsür aser tanurtem kümzüksüla," ta paisa shisem.

India-isa Israel-Palestine mangatettep ken o bentettsü atema ken o jembi tenzüksü ayongzük.

Israel aser Hamas kiralongrartem tsüngda rara tenzüker Bodhbar tashi nung anogo 19 abensaogo aser nisung 6,000 dak tema süogo.



TIR YIMYIM YIMOBILEM (EDITORIAL)

DIMAPUR RASEMNÜ, MONGPUTENI (OCTOBER) 26, 2023

Aluyimtsüba limabo ka dang !

Asenok aliba lima ya dang masü, ano kasa lima amai anasemka ali nungbo kecha tapayu maka amshiyonga kecha balaka shisabolutsüsabo mesüla, saka alima ya ka dang, anungji iba lima mejungi kümra asenok kanga timatemtsü. Ibaji yimdangi arua tanübo United Nations sabang tashi nung alima nung chiyongtsü züsentettsüsa alitemo shia arudaktsütsü asoshi kanga süoki ia jembir. Atangji, alima nung mozü amshia alu ayimtsü tenzükba nungdak aser nükjidongji alima nung alir meimchirtem shinga aya agibo masütsüsa alu nungi peria züsentettsü asoshi liasü. Aji oda, iba nükjidongji tongteta tanübo alu nung ali temo mozü amshia ayimba agi nisung ishikati alu ayimba agi yimer ajak peritsüsa züsenteter. Ashi, ali temo mozü amshia alu ayimtsü memetetba mapangbo, alu nung nisung ajak peria mezüsentetba agi, alima tesem aika nung ayaba agi nisung zünger mezüngma asüba osang angashiogo. Atangji, tanüa alima tesem aika nung nübortem aika tebok mesüngtet timtemdagi, ajisüaka itemjibo alu nung chiyongtsü junga mezüsentetba agi masü aser alima nung chiyongtsü makaba agia masü saka chiyongtsü jagi parnok matongba agi timatemerba dang lir, kechiyong alima tesem aika nung chiyongtsütem chir mechima aser lemer melema aser yoker meyokma tamajung kümer endoker. Itemji alu nung alitemo mozü amshia ayimba ajanga alima nung alir temang peritsüsa züsentetba takok mapatem lir. Ajisüaka, tanü asenok atema tebilemstü yabo alima nung ya asenoki mozü tali amshia alu ayimba agi, joko mozü amshiyonga meyimtettsüsa aluyimba li tesem tulubalenka ali teret aser takong dang kümogo. Ibaji, talisa, asüng lia aotsü purtem asoshi tebilemstü tulu lir. Atangji, alima ya kodangka samatsüar shingaia memetet, anungji alima nung tanü asenok aliba ya tatem masü saka asen chirnur aser semchirsepnurtem lijen lia aotsü. Anungji, tanü alima nung alirtem asoshi khuret tulubaji tanü masü tarutsü nung lia aotsü purtema alu nungi tebok sünga züsenteta alitsüsa tzü aser mopung dang masü saka alia alu yimtettsüsa ali temo keta shitak yutsütsüsbaji lir. Iba nükjidong nung tanübo alu nung mozü amshiba agi ali raksatsüsa masü saka ali meraksatsüba alitemo organic mozü amshir. Atangji, alu nung alitemo mozü kenyongi mamshi aser tsünüsenpongtsü chitsüba longben aser mesen tepsettsüa mozü mamshi ser akhi tetsü tebou mapang ayimba amato teka agi kisüng ai den raraa alu ayim nungbo asen kisünga peria mezüsentettsü, anungji tanübo alitemo akumba mozübo mozü saka ali raksatsüba mozü masü saka ali shia arudaktsütsüba mozü amshir. Item mozüji au süngküm aser süngdonglidongtem nungi atsüzüka amshir. Iba jagi akhidang ali dena raksadaktsüba mozü amshia alu ayimdang tangar dang dena ayoktsüsa züsentetba ama, asenoki organic ali temo aser mesen tepsetba mozütem amshiba ajanga tzünüsenpongtsütem junga atanger aser chiyongtsü züsentetba ajunga nungji temang raksatsüsa masü saka taneptsüang angutsüsa yimteter. Item mozütemji amshia asenoka aluyimba süoshi tetsüng teben nung semoker anü tanep mapang anepdang khen aser nikongdang khen ta inyakba kisüng agi asen peri dang masü saka tangar dangia yoktsüsa züsentettsü. Iba amaji mesüi, tebilemdang makai tanü ajung dang asaa asenoki tzü, mopung aser ali ajak raksaa toktsüra, ajibo asenok tarutsü chirnurtem asoshi alima nung molumi yanglua toktsür asütsü. Atangji, tang tashi nunga asenoki asen lima nung akhidang züsentetba chiyongtsütem mezüsentettsüsa ali tulubalenka raksatsüogo. Ajisüaka, ali shia arudaktsütsüji temenu masü, asenoki tang danga ali raksatsüba mozü amshi anener, ali meraksaba mozü amshia alu ayimtsü tenzükra, iba jagi yimkong peritsüsa asenok ishikati alu yimtettsü. Atangji, alima yabo ka dang, asenoki yangi ali raksaaa yutsür, alu tajungba ayimtsü asoshi tanga lima ka mebushitettsü, anungji kanga apayua asenok sülena alu tajungba yima otettsüsa asenoki ali kanga meima anepalutsüla, kechiyong tanü aser asünga teti ali nungi züsentetba agi alima nung meimchir taküm lia aotsü.

OLEMSABANG

"ABAM 1986 Lemtet" OCET JANGJASHITSÜR

~ Molungkimong Mejensanger Putu Menden

&

~Molungkimong Literature Board

Tir Yimyim adok Oct 21, 2023 nü asen Aor teintet ordained minister asem Rev. P. Longri; Rev. Tongpanglepden aser Rev. S. Apong par asem-i sign sür adokba ocet nung "1980 ABAM Special Committee lemtet nungji aibelen kar reprangtet nung ibaji bushidangtsü atema Special Committee nisung 15 shim" aser par aseme kuli kar aguja parnoki "1980 Special Committee-i lemtetbaji kuli makai kumdaktsü" ta züluogo. Ano Tir Yimyim Adok Oct 25, 2023 anogo ano parnok ordained minister asem – Rev. T. Luen; Rev. C. Walu Walling, aser Rev. Awala Longkumer – ajanga "1896 lemtet agizüka ayuba" "tang tashi takum lir ta onokibi kuli agütsür" ta ocet nung züluogo.

Nenok ordained minister trok-i (6) züluba yabo jangjashitsütsü nungdaker ta ajiteta iba ocet ya adoktsür.

ABAM 1980 inty Mungdang nung renemba Resolution No. 42 ajanga Rev. A. Temjen Impur (Chairman) aser Apong Pastor Khari (Secretary) sür züngsem 17 agi akumba Committee ka shimteter parnok Committee-i kechi bener arudir aji tatembang asütsü ta tashi ajak agütsü. Iba ABAM Special Committee 7th November 1980 parnok tatempang report nung "doctrinal view" (ABAM Nov 1965) nung ajemdaker Molungkimong Arogo Centenary shidak mongogo aser Molungkimong Arogoji 1872 – 1919 tashi tamanger metangtangi lia aru ta ABAM joint Committee-i bushitetbaji ABAM Special Committee-ia agizük. Iba mangatetep O tatempang akumba Report ya Ao Arogo ajak dangi yoker ta report nung zülua lir.

Saka, Molungyimsen Putu aser Arogo senteper amokmerena yamai shity ka zülü (Dt. 8th January 1981): "Yimden-yimli aser Arogo Yimli nung teyazü kuli O amshia kongshiogo. Anungji Arogo yimli, Yimden Yimli aser Yimja-yimkum raksatsübaibo tai madoker. Iba research committee reportji January 31, 1981 tashi nung meyipa magira (withdraw mesüra) tai temeten bushitsu asoshi tapet Court nung 5 buba ABAM joint Research Committee anema O agütsütsü aser O akatsü." (Kechiba Molungyimsen Putu aser Arogoi ABAM 1980 Special Committee tatempang akumba Report masü saka ABAM Joint Research Committee pur Reportji ang anema withdrew mesüra tai temeten bushitsu asoshi tapet Court nung O agütsütsü aser O akatsü ta amokmeren?)

Anungji Arogo otsü ken-o tatempang kumtsür aliba tanaben 15 Member ABAM Special Committee ka shima ano iba ken-o reprangdangtsü nungloktsü. 1980 ABAM Special Committee nung liasüba züngsem Reverend tain aseme sign sür "**1980 ABAM Special Committee lemtet nungji aibelen kar reprangtet nung ibaji bushidangtsü atema Special Committee nisung 15 shim**" ta tanü ner aseme ashir, aser 1981-1986 ABAM Special Committee Report nung ajemdaker kuli mesütsü meji mezüng Molungkimong nunger 1872 nung Baptirtem parnok 24 prongla asadangba masü saka tenüng pezü – Supongmeren; Imnameri; Imlichiba aser Imnapokim dang agiteter langzü aser "**item kulitem ajanga onok 1980 Special Committee-i lemtetbaji kuli makai kumdaktsü**" ta zülü. (Yabo ner aseme iba ocet nung 1980 tatempang akumba report samatsünüba nükjidong nung bendenloka züluba dang). Imlichiba Walling ya 24 October 1876 anogo yim tasen akumer telok den dena ayi, saka 1885 küm tebuttsü Mongjenla den Molungkimongi meyipa adok. Imnameri Longchar, Molungyimsen nung alitsüba kodanga mao. Pa tenüng Molung Arogo register nung aliba 1892 küm membership transfer asü, aser pa Molungkimong nung dang lia 1930 küm takum tembang.

Aji süaka, ner aseme 1980 tatempang akumba kuliji meyipa agiyonga tanü Ao Arogo lipokdang 1872 küm Molungkimong nunger tzüsener parnok rongnung Pangnemchiba Walling aser Zikaba Tzudir tena dang tasüba anogo Missionary record mesüra oral source ajangaka monguteter saka tanüngba kodang asü, Molungyimseni kwi ao, kwi mao, shirnoksa meyipa adok aser shirnoksa tayi akum parnok ajak kuli tejangja lir. Iba yongji 1980 küm süshia tanüa süshia Molungkimong nung 1872-1919 tashi tamanger metangtangi lia aruba kuliji shiteter.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Koinonia Baptist Arogonung Men's Evangelistic Camp agiogo



Evangelistic camp nung adenertem tangokba noksa nung angur.

Kohima, Mongputeni/ October 25 (TYO): Koinonia Baptist Church (KBC) Men's Department evangelistic camp ka October 19 nungi tenzuka October 24 tashi EAC Headquarter Kezocha nung agiogo; iba camp omenji Lipok 1:26 nung ajemdaker agi, ta Koinonia Baptist Church Media ministry-i sangdong ka ajanga metetdaksü.

Iba camp nung adener ajak senteper nisung 138 liasü.

Tongti o jembirtemji Rev. Zotuo Kiewhuo, Senior Pastor; Pastor Medotseilieü, Pastor H Rokopra Mekro, Pastor Neibalie aser Assistant Pastor, Zashekhho Hibo nung liasü.

Iba camp nung jembiba onüktemji; Temenen aser temenen menaba taa,

temelung meyipba aser tekümtet; Sarasadem, lumiba, anepongi sarasademba aser tatidang; Baptiba aser tanela sempet; Kibong aser Arogonung tebu ka teinyaktsü shilem; osangtajung prokba tsütsü rongsenketzung aser ketdangsüba; Satan külemba-temaitsütem aser teptsü atepba, movies, music, games asayaba; Temoatsü aser atakatem; Tatembang anogo temaitsütem; Ter shilem aser tenla agütsüba; Tanela anir aruba Ministry aser Khirsta tanaben aruba liasü.

Kasa camp nung shisalen sayur MLA, Dr. Ato Rhetso-i 'Chiyungtsü aser anema alibaren' aser Bethel Medical Centre Managing Director, Dr. Kezhalezo Angami-i 'Yi aser yi ajemba ajanga takoksa' onüktem jembiba liasü.

Camp nung adenertem telok pezü- Joel, Nahum, Zaphaniah aser Obadiah, ta lemsar tetoktepba balala agi aser Best Campers ji Kevikhohou Sorhie, Ketosü Rikha, Nosel Khatso, A Longhoi Shui, L Toshimeren Longkumer, Kevilhoubel Semou, Vikuosielie aser Thinuoneio Thevo nung liasü.

Camp nung adener ajak nija counseling-a agi. Camp nung adenertemi yi aser temesepba mozü toktsü, temenen yongrak nungi sala aser shi nunga taneptsü ngua liasü.

Camp director ji deacon Lhouzakie, Assistant Director Khriezovolie Suokhrie (Men's Dept. Chairman) aser Neizokhotuo Belho nung liasü.

'After Death' film October 27 nü sayatsü

October 25, 2023: Don Piper-i direct asüba After Death (PG-13) film October 27, 2023 nü theaters nung sayatsü; iba film ya nisung asüba sülen kodaki oor tanaben shia aruba tatalokbatem indang film lir.

Don Piper-i nisung ka süadoker tanaben shia aruba nung mamangi liasü ajisüaka 1989 küm pa dak-a yamaji khen ataloka liasü.

Küm 30 tejaklen Piper gari lendong ka nung tsükoka liasü, aser iba tesem nungji paramedics-i pa süadokogo, ta sangdong. Piper minute 90 shi asüba mapang nung pai kodak angu, asürtem den jembiba aser kodak tenyartema angu, ta pai ashi.

Gari lendong atalokba tesem nungji nisung kati Piper atema sarasademtsüdang pa tasü nungi shia aru.

'After Death' film nungji Piper densema shi nung süadoker kodaki aoba aser tanaben tasü nung shia arurtem aika indang otsü shia lir. Angel Studios indang 'Sound

of Freedom' film kanga takok anguba sülenbo parnok indang film tasenbaji After Death asütsü.

Osangbener den jembidang Piper-i, "Iba film ya nisungtem kodaki anitsü indang film ka lir. Iba ya sensaksem tenzükdaksüba film ka asütsü. Ajisüaka tongtibangtibaji, iba film ya Tsüngrem sentsüwangshi angutsü atema nisung ka atema mezüngbuba mera asütsü," ta ashi.

Piper-i kaket-a aika züluogo, aser item rongnung '90 Minutes In Heaven' kaket densema lir aser iba kaket nung ajemdaker After Death documentary film ya yanglu.

Pa par Arogonung pastors conference ka nung adenba sülen kidangi meyipa aoba mapang nung pai gari lendongji ajurua liasü.

"Apu tila ka nung aoba mapang tractor-trailer truck ka tiyongtsüü aita kü gari nung tsükoktsü. Truck aser kü gari densema ano gari anata kongshia liasü. Sayatenya

ajanga shinga meyiru saka nibo yirua idangyongjisa süadok. Paramedics pezü den state trooper kati ni shia arudaktsütsü atema merang saka shia marudaktsütetba sülen waterproof tarpaulin kati kü mang meyibanga liasü," ta Piper-i metetdaksü.

"Gari tsükokba mapang nungjisa ni kodaki ao. Ni kodak kikümbang nung nokdaka liasü. Jungkai Adok nung kodak kikümbang 12 indang shia lir aser ni-a item kikümbang ka rongnung nokdak. Ni meketa ni meteta alir asürtem liasü. Onok tanaben longjem aser parnokji jangratemtsüka angu," ta pai ashi.

"Kentenmenüji asenoki angashidangba dang nungi khenyongi balaka liasü. Kodak nungji ni khenyongi ken meyrjang aika atenba angashi, ajisüaka item kenji memeyoktep, saka kanga putepa liasü. Kodaker tenarong ajanga khenyongi ken ajakji bendangteta angateta liasü," ta paisa metetdaksü.

ANOGO ABEN TSÜNGREM DEN

Abelen mesüra achiji?

"Aser kodang nenoki tachijilen mesüra tabeleni meyipdir, nenok tenarongi nenok tesülen ola ka shia angashitsü, lenmang ibai lir, iba nung jajaang." (Isa. 30:21).

Kodang tebilemba ka nung teshisadangba ajak lidir telemsa adoker. Teshisadangba shitak mayuba ajanga Khristantem telemsa adoker aser rajang akümer. Lai tesayuba den meputeper. Ibai ozü ka mesüka lir; ozüi tashikang ka kisüngi yima mouteter. Asenoki temeshi Lai tesayuba nung temulung agütsüra aser Tanela Temeshi nem bendanga agütsüra, asenoki pa tenangzükbatem akangtsü akok.

Tanü asenoki iba ochi tenangzükbata ana indang shisadangdi. Tsüngrem Temeim aser Tsüngrem Ain Adokba. Kodang Tsüngrem ain adokba aser temeshiba kasasa mesülir idakji Tsüngrem tsübuba malitsü. Kangki nung Tsüngrem temeim aser ain adokba pilatsü mokoki sendaktepa lir. Charles Spurgeon shiba dang prince of Preachers ta aja, pai ibai shitak jenjang nung yutsü; "o bendanga nok-i asenok metsübudaktsütsü; saka tsürabur artsüng maneni amshir." Tang aser Tarutsü indang kari Khrista indang shinba ajak dang ataloktsü ama imlar. Kari pa tanaben arudang sentsüwangshi ajak angutsü imlar. Mezüng teloki tanabuba telok dang tepenzür ta ajar. Tasen Lai nung tenangzükbatemala ajakji tang aser tarutsü asoshi. Asenok tanü merüka alitsü akok, saka Kibuba Khrista tanaben arudang dang tabensa akümtsü (1 Yn. 3:2,3; 1 Tesa. 5:23). Kotak obala, Ne yimli asoshi ni dang temsüa alitsü yariang.

Pakistan nung court kati Khristan apuani na bail nung chiok



Shaukat Masih'er kibong noksa nung angur.

Lahore, October 25 Tamoor-i ken o agütsüba nung ajemdaker tena anema ken o benok. (Agencies): Lahore sessions court kati Tsüngrem mezüngmeshiba ken o ka dak sendakba nung tai tonglokja alir Khristan apuani na nem bail agütsüogo.

Additional Sessions Judge, Mian Shahid Javed-i ken o angadangba sülen Khristan apuani- Kiran Bibi aser la kinüngbu, Shaukat Masih na bail nung chiok saka tena dang surety bond sen meyrjang 20,000 meshi.

Taküm September 8 nü Lahore police-i Pakistan Penal Code (PPP) kübok Arrla 295-B nung ajemdaker tena anema ken o benoka liasü. Par kiyonger, Mohammad

Tamoor-i ken o agütsüba nung ajemdaker tena anema ken o benok.

Kiran Bibi aser la kinüngbu Shaukat Masih nati Koran kaket nungi tapak kar shisar Mohammed'er kilem nung indok, ta tena nem tai tonglokja liasü.

North Cantonment area nung alir Mohammed Taimuri, pa dokan ka nung shishilembaba mapang nung azüklen nungi shidi teshisa kar alua angu, ta ashi.

Ajisüaka tia kaa police-i tiyongtsüü aiba ajanga loktii Khristan apuani naji tepsettsü aliba nokdangtet. Police-i tena apuba ajanga dang Muslim nung matsüngdang nungi tena kümzü.

AO OSHI ANGAZÜKDAK: TANÜ ANGAZÜKTSÜBA OJANG



Sasa

(v) tai inyaker jashia bilem (regret)

* Ni' ozü tsürabur dang tashi mangaba sasar.

Sasapela

(adv) pelapelaajak den jembiba, tejembinü (cheerfulness)

* Sasapela nisung ajaki meimer.

OLONG PAITEP # 6676

16x16 crossword grid with numbers 1-17 indicating starting positions.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S _ _ _ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangliba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 6675 TELANGZÜBA

TIPIEN :

- 2. Bangsemo, 6. Tiptem, 8. Jen,
9. Talida, 11. Aren, 12. Tzübo,
14. Alia, 16. Angati, 17. Odi,
18. Azü, 19. Sunglang.

LANGTSÜNGLEN :

- 1. Yipten, 3. Nüja, 4. Sangro,
5. Milen, 7. Tulu, 10. Laza,
11. Aben, 12. Tiyong, 13. Ajizük,
14. Aitsü, 15. Tasa, 16. Aina.

Tepela Tasoba Anogo. Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :



Bodbarnü Manipur Chief Minister N. Biren Singh-i 'Meri Maati Mera Desh' nung shilem ka ama Amrit Kalash Yatra tenzüksüba angur. Imphal nung aliba Chief minister's Secretariat nung Western Gate nungi Biren-i Amrit Kalash Yatra tenzükja liasü. Iba telok nung Art and Culture Department, Youth Affairs and Sports Department aser Nehru Yuva Kendra nungi teshimtet nübotem dena lir.

ULFA (I) pro-talk faction-i Kaziranga nung senden amen

Guwahati, October 25, 2023

(Agencies): Olemtep nung adenba United Liberation Front of Asom-Independent (ULFA-I) pur Kohora, Kaziranga nung aliba JB Resort nung senden ka menogo.

Iba senden nung Chairman Arabinda Rajkhowa aser Anup Chetia nati aniba ULFA telok nungi züingsemtem aden.

August 18 nü Centre, Assam sorkar aser United Liberation Front of Asom-Independent (ULFA-I) pro-talk faction pur Delhi nung senden ka mena liasü.

"Olemtep ano metembang. Senden nung onük ajak benoka lemsatepogo aser onoki Assamese nunger yimtenren temeten atema tongti süa jembi" ta ULFA (I) General Secretary Anup Chetia-i ashi.

Tanü senden nung ULFA(I) chairman Paresh Baruah indang onük benoka melemsatep kechiyong iba ya Paresh Baruah-i aniba telok den senden amenba masü.

Senden nung Interlocutor AK Mishra aden aser ULFA-I-i takhangba onük 11 benok.

Temai adokba telungpurtem kümzüka ayutsüba aser yimtenren temetentem kümzüka ayutsü atema jembiogo ta Anup Chetia-ia ashi.

DIMAPUR CHÜMOUKEDIMA ASER NUILAND LONGPOK SEMCHIR TELONGJEM

Lokti Senden

NUKJIDONG: Telongjem
ANOGO: 28th Oct 2023
MAPANG: 10:00 a.m

TESENTEPDAK

Mr. & Mrs I Wapang Longkumer
Island Colony Dimapur (Kimen)

TETUSHI TEJAOKER

Shri Moatoshi Longkumer

Honourable Advisor Labour & Employment, Skill Development & Excise Department Govt. Of Nagaland

MENDENPURTEM

1. TIR

Tsuktimeren Longkumer

2. TATONG TIR

A Taku Longkumer

3. TONGTI ZULUR

Chuba Longkumer

4. REPSEM ZULUR

Dr. Pogyim Longkumer

5. SEN ZULUR

Toshilemba Longkumer

6. KIMEN

I Wapang Longkumer

Sendong

1. SARASADEMTSÜ

Rev I Wati Longkumer (Associate Pastor DABA)

2. MENDEN OKILA

Tir

3. TSÜRABUR KEN

Longpok Semchir Telongjem Ungma.

Tayonger (i) Tekanungba (ii) K Lima Lkr

4. TAYONGZÜKBA O

Shri Lanuteka Longkumer, Chümoukedima

5. TETUSHI TEJAOKER - "O"

(i) Tongti Osang (ii) Audit Osang (iii) Nungtet Luden Osang

(iv) Drafting Committee Osang

7. O LEMTEPBA MAPANG

8. MELEPZÜNG O

Tatong Tir

9. TATEM SARASADEM

Telok

METETDAKTSÜR:

- 1. Dimapur, Chümoukedima aser Nuiland nung alir Longpok Semchir ajak medema arua atentsü mepishir.
2. Kilen Saru 2020-2022 koba yimisa magutsü-i ali iba anogo nung bener arutsü mepishir.
3. Sendong temer lokti chiyongba mapang alitsü.
4. Iba anogo nung Longpok Semchir traditional waist coat semer arutsü metetdaksür.
5. Ajaki iba sendong takok asoshi sarasadema atatsü mepishir.

Defence Minister Rajnath-i Arunachal nung forward posts semdang



Guwahati, October 25, 2023

(Agencies): Union Defence Minister Rajnath Singh-i October 24 nü Arunachal Pradesh nung forward posts semdanga liasü.

Defence Minister-i Line of Actual Control (LAC) nung mapa lemezüka aliba sepaitem den ajurutepa sensaksem aser parnok den külemi Dussehra benjung among.

Arrtsü nung mapa lemezüka aliba sepaitemi tasü aitba aser bendanga agütsüba atema Rajnath-i pelaba metetdaksü.

Linük aser nübotem kümzüka ayutsü atema mapa tajung inyakba asoshi Armed Forces dang kanga pelar aser nüma atanger, ta paisa ashi.

Minister Rajnath Singh-i Tawang nung aliba sepaitem den Shastra Puja among.

"Dussehra ajanga tajung ajanga tamakok madak takok anguba kuli agütsür. Tasütait Singh-i October 24 nü Arunachal Pradesh nung forward posts semdanga liasü. Defence Minister-i Line of Actual Control (LAC) nung mapa lemezüka aliba sepaitem den ajurutepa sensaksem aser parnok den külemi Dussehra benjung among. Arrtsü nung mapa lemezüka aliba sepaitemi tasü aitba aser bendanga agütsüba atema Rajnath-i pelaba metetdaksü. Linük aser nübotem kümzüka ayutsü atema mapa tajung inyakba asoshi Armed Forces dang kanga pelar aser nüma atanger, ta paisa ashi. Minister Rajnath Singh-i Tawang nung aliba sepaitem den Shastra Puja among.

Tawa pai Italy nung Montone memorial (Perugia Province) semdangba indang olen ka ashidang "iba ya World War II nung tsükchir ket nungi Montone meyipa agütsü atema raradang Naik Yashwant Ghadge aser tanga India sepaitem shilem agiba atema yangluba nüngshilung lir" ta Rajnath-isa ashi.

India nungeri dang masü saka Italy nungeria iba nüngshilung nung akhüm tetushi agütsür aser iba ajanga India sepaitem tasü aitba kuli sayur, ta paisa metetdaksü.

"Prime Minister Narendra Modi lenisüba kübok India-i defence atema 'Aatmanirbharta' tsütsü mapa tulu inyaktetogo. Tesüiba nung asen mitkar ajungkettsü ateam tangalen nungi osettsüset bener aru, saka tanübo prangpong-injang teimbaka asen linük nung yanglur" ta Rajnath-i ashi.

"Foreign company temi asenok den technology lemsateper aser India nung osettsüset yanglur. 2014 nung defence exports Rs 1,000 crore shi liasü saka tanübo asenoki crore meyirjang aika export asür" ta paisa ashi.

Defence Minister Rajnath-i Tawang War Memorial semdang aser idakji 1962 Indo-China war nung taküm bendanga agütsür nem tetushi agüja narjung ka yutsü.

Iba mapang Chief of the Army Staff General Manoj Pande, General Officer Commanding-in-Chief (GOC-in-C) Eastern Command Lieutenant General Rana Pratap Kalita, GOC 4 Corps Lieutenant General Manish Erry aser Indian Army nung tongti ketdangsürtemi pa meina senzü.

China-i telescope tasen ka amenoktsü sentong aliba sangdong

Beijing, Mongputeni/Oct. 25 (Agencies): China-i Bodhbarnü sangdong ka ajanga anünglak bushisüngdangtsü atema telescope tasen ka yoktsü sentong aliba sangdongogo. China-i parnok indang space station-i astronauts asem yoktsü atema renemba mapang tang iba osang sangdongogo.

Xuntian ta nüingja agütsür iba telescope ya China indang Tiangong space station-i install asütsü aser iba space station den külemi alongtsü, ta Chinese Manned Space Agency otongdar aser deputy director general Lin Xiqiang-i metetdaksü.

Iba telescope tasenba amenoktsüba indang mapang tatakzük ka magütsü. State broadcaster CCTV-i ashiba agi, iba telescope yagi anüng bushisüngdang aser mapping

nung teyari agütsütsü. China-i, küm meyirejang aika anüng nung petinu aser alimatem senzüsenpongba bushisüngdanga aruogo aser tang parnok space exploration aser science nung lenirtem rongnung ka kümogo.

Astronauts Tang Hongbo, Tang Shengjie aser Jiang Xinlin nungeri space station nung tang tua alirtem melentsü lia iba osang sangdongogo.

Parnok asem ya Brehostibar anepdang apusotsü imlar. Tang ya astronaut tejen ka lir aser pa lenisüba nung 2021 küm team ka ita asem atema space mission ka nung shilem agia liasü.

China ya space exploration nung kanga tejakdangi ogo aser parnoki ashiba agi, küm ter tashi nungbo ita-i crewed mission ka yoktsü sentong lir aser iba den anüng

bushisüngdangba sentong balala benoka inyaksangshitsü sentong aliba metetdaksüogo.

Iba sentong ya United States den tetoktepba ka dang masü saka Europe, Southeast Asia, South America nung aliba linüktem nungi teyari meshitsü asoshia lir.

International Space Station nungi medendaksüba sülen China-i parnok indang space station ka yanglua liasü. Ruling Communist Party indang military branch, People's Liberation Army-i sentong azüokba ajanga US-i tebilemsü ka bilemba ajanga parnok International Space Station nung medendaksü.

China-i mezüngbuba 2003 küm anüngi nisung yoka liasü aser parnok ya Soviet Union aser U.S na sülen anüngi nisung yokba tasembuba linük akum.

UNGMA ALIR IMERTETBA SEMCHIR ZÜNGSEM NUNGI ZÜNGDOKER TA SANGDONGER

Koridang li koba Imertetba semchir Chitensem chir aser Liden semchir indang arok kidong li lir, iba nungi aruba rongsen nung Chiten aser Liden semchiri tekoklak atentsü ta ashiba nung Imertetba semchiri yamaji kodanga benshia maru, anungji memelatsü ta nokdak. Ibayongji Chiten aser Liden semchiri tashiyim amshia Imertetba semchir dak ozüng lalokja yimden nung atongsema alir Imertetba semchirtem sü indokja yimden nungi anentsü. Yamaji liyonga arudang Ungma Jenangsanger putu menden tasen ka tenzüksüsa mapang agi bener arutsü. Putu menden tasenba purtemi Imertetba semchirtema parnok rongnung atentsü aniok. October, 2023, nung nütsüng saru bendenba anogo tonga arudang Chiten aser Liden semchir nungi 3rd October anepdang tenyar yoka Imertetba semchir dang parnok nem tekolak metentsüra putu menden tasenba nungji atentsü makok ta o agütsü. Iba o ji angazüka 3rd October nungsa Imertetba semchirtem mensem ka lia telemtetba agir Chiten aser Liden semchir dangi onük ana bener tenyar yok. Mezüngbuba o ji; "Onoki kodanga tekolak metentsütsü, joko asenok kidong balala kümogo, anungji nenoki onok nem nenok telemtetbatem temetdaksü." Tanabuba o ji; "Koridang li nungji shir li nung shir atenar jangjatsü atema yimden saru bendenba anogo tembanger terok nü lir tenet nü buba nung asen tebou asem sanger Koridang li oboula lmsabang kimong nung ajurutepa Tsüngrem tsüngdang azüngashitepdi." Item o agütsüba sülen anogo ishika tsüngda nung Imertetba semchir rongnungi parnok ter asem (13) kin anema nokdaka Chiten aser Liden semchir dangi oa parnok tekolak tentsür tejenba menden nung yimden shilem agizüka tendi ta mepishi aser parnoki mepiba agizüka parnok yimden nung aniok. Iba osang angashia Imertetba semchirtem 15th October 2023, nung mensem ka liasü. Kin anema apusortemjia mensem nungji jaok, saka parnoki marutsü ta osang agütsü. Anungji kini telemtetba yamai sangdonger;

Parnok nübu ter asemi kin telemtetba anema aoba dang masü, saka iba dak tematiba tetsü-teboui wazüka yutsüba yimmi mezüngmeshi nung, parnokji Imertetba semchir züngsem nungi teti asoshi züngdoker. Parnokji kin nung kecha shilem maka. Koridang li nung Imertetba semchir shilem nung parnok kenyonu maten. Imertetba semchir züngsem nungi züngdokba nübu ter asemji itemi alitsü;

- | | |
|--------------------|------------------|
| 1. Imkongmeri | 8. Toshisangba |
| 2. K. Bendangtoshi | 9. Takokümzük |
| 3. Samalemba | 10. Imnatongdang |
| 4. Chungpongchiten | 11. Limawati |
| 5. Taliyangba | 12. Puronen |
| 6. Artluin | 13. Zülutemjen |
| 7. Imnamayang | |

Kin nung tambortem :
Kin nung tambortem:
 1. Tinunuken
 2. Sakutemjen
 3. Lanutoshi
 4. Tinukumzuk
 5. Imtinungsang

Otis yipru Mexico anüolentip nung kongshi

Mexico City, Mongputeni/October 25 (Agencies): Hurricane Otis-i Mexico anüolentip len tzüküm nung konshioogo aser iba yipru ajanga mopung speed 165mph (270km/h) tashi bener aruja liasü.

Iba yipru yagi Bodhbar anepdang nungtugu Acapulco resort anasa kongshia liasü, ta National Hurricane Center (NHC)-i ashi.

Ketdangsürtemi taküm samatsüsa yipru ka arutsüba aser iba ajanga tzünglu bener arutsüba agi anentsü lendong dena adokdaksütsü akok ta tekümdangtsü metetdaksür liasü.

Ajisüaka yipru ya ali atongba mapang tashi nungbo tashi maitba kümer liasü.

Otis yipru agi mekongshi tsüngda mapa ka atema David Hall, Acapulco nung Princess

Mundo Imperial resort tonga ao aser pai BBC dang ashiba agi, mopung aser tzülung ajanga pa anenba hotel raksatsüogo.

Paisa, mopung kanga sashia aonba ajanga ajanga hotel nung kichiba raksatsü aser kima nung aliba janaona tem takdang tulungi aita liasü, ta ashi.

Hall, shiba Mexican city nungi lir pai ashiba agi, pa anenzüka aliba ki ya menoknok anoker ama anokshia liasü.

Paisa, hotel nung anena alirtem aika yipru tesashitiba atiba mapang tesem ka nung adenshir liasü, ta ashi.

"Nisung aika kanga tsübutepa liasü," ta Hall-i ashi.

Guerrero state kübok Zihuatanejo aser Punta Maldonado na tsüngda tzüküm km350 tashi iba yipru yagi kongshitsü ta tekümdangtsü

metetdaksür liasü.

Mexico indang civil protection body-i ashiba agi, Guerrero nung yipru ajanga Power nung minprong adokogo. Yipru aitsü aliba ajanga state nung school tem ajak shibangtsüogo.

Video ka ajanga Acapulco nung mozüki ka raksaba aser Copacabana hotel kima tzü agi metsünger aliba sayuogo.

Mexico indang national water agency-i ashiba agi, tzüsem meter 10 tashi aruba Oaxaca state kübok Guerrero tzüküm nung ajangshitsü akok aser iba den anentsüh agia iba tesem kongshitsü akok.

Kasa mapang nung tir Andres Manuel Lopez Obrador-i, ayong nungi pilar emergency shelters tem nung oa jenoka atatsü atema nüburtem dang mepeshia metetdaksüogo.

Israel-i tayimtsü amshia amakdang southern Syria nung sepai ti asü



Hezbollah Media Relations Office ajanga sayaba noksa ka nung Hezbollah lenir Sayyed Hassan Nasrallah (achichi)-i Palestinian Islamic Jihad tekolakba Ziad al-Nakhleh (tiyong) aser Hamas deputy chief Saleh al-Arouri den Beirut, Lebanon nung ajurutepa senden amenba angur. Nasrallah-i Hamas aser Palestinian Islamic Jihad ketdangsür den ajurutepba ya ita tetenzüklen Hamas-Israel rara tenzüker ano Lebanon-Israel arütsü nunga rara tenzüka mapang parnok tsüngta mezüng ajurutepba alitsü.

Damascus, Mongputeni/Oct. 25 (Agencies): Israel-i tayimtsü amshia amakdang southern Syria nung sepai ti tepset ta Syrian state media

ajanga ashir, koba tamale rocket khaloktsüba mechi amak ta Israel army temi ashir.

Israel north tsütsü Lebanon aser Syria den arütsülen

Lebanon nung Iran-i yariba Hezbollah telok aser Palestinian factions tem den rocket aser artillery tanen makai khaloktsütepba ajanga

Israel-i Gaza Strip nung Hamas den raraba nung ano tongpang tasen ka adoktsü akok ta tetsübo lir.

Taoba hopta Syria south tsütsü Palestinian factions temi arütsü alema Israel den ishíben khatepa liasü.

"Mongulbarnep 1:45 ako meta Israel tsükchir temi tayimtsü amshia occupied Golan Heights amak," ta Syrian state media ajanga Bodhbarnü ashi.

Iba lendong nung ano sepat tenet yiru aser osettsüset raksatsü ta ashi.

Britain nung amenoker Syria nung tensa balala asadangba telok, Syrian Observatory for Human Rights-i tanishir pezü densema sepai 11 asü ta ashir. Iba telok ya Syria nung tesendaktep balala lir aser itemji ajanga osangtsüsang bendener.

Iba mapang hadir ayuba tesem ka aser Syrian air defence radar ka raksatsü aser infantry unit ka nung tenük yoka liasü ta ashi.

Hezbollah sülen anidaker shirnok Syrian rara nung sorkar meyong sepaitem den külemi rarar, parnoki Syria south tsütsü Deraa province nungi Mongulbarn nikongdang occupied Syrian Golan tsütsü rocket tem khalokja liasü ta Syrian Observatory ajanga ashi.

Bodhbarnü Israel army temi ashiba agi, yashi (Mongulbarnü) Israel tsütsü rockets tem khaloktsüba nung telangzüba agüja par fighter jets temi Bodhbarnü Syrian army meyong ki o jen aser mortars alidak amak, ta Israel army-i shia liasü.

(Maneni tapak 8 nung...)

SMI-i Nov 3 & 4 Ungma nung 'Throttle Thrust V' ayongzüker

Mokokchung, Mongputeni/ October 25 (TYO) : Spearhead Motorsport Initiative (SMI), Mokokchung-i ayongzüka 5 buba Throttle Thrust taruba Nov ita 3 & 4, 2023 anogo ananü Mokokchung district kübok Ungma yim lushi nung akatsü sentong renemogo, ta SMI sangdong ka ajanga metetdaksü.

Throttle Thrust ya Team Spearhead indang kümshi ayongba sentong ka lir, saka tesüiba küm ishika tensa tia

mesüngjemetba ajanga küm asem tashi mekateti aru. Taküm iba asemtepa sentong Throttle Thrust V ya SMI züngsem asür Imtimayang Jamir bilemteta ayongzüker, ta parnokisa ashi.

Asemtepbaji super-sprint aser hill climb format nung alitsü aser telemsa asem (3): Below 1300 cc, SUV aser open category nung akatsü. Iba asemtepa tetoktepa nung senpet sen ajak senteper (prize pool) 3.5 lakhs alitsü, ta parnokisa metetdaksü.

Iba tetoktepa nung 'Stag Global'-i title sponsor asütsü aser 'Nagaland Mineral and Mines'-i platinum sponsor asütsü. Tejangrartem asoshi 2nd November, 2023 nü 10:00 ako nungi tenzüka Tourist Centre, Ungma yim (Mokokchung) nung tenüng zülüokba maparen (registration) inyaksü. Iba dak sentakba nung osang tejangja metetnürtemi iba mobile number (8131801809/7642825097) ajanga tayongertem den tongteprateptetsü.

Phek jila nung inter school football asayamung tenzüko



Asayamung lapokba asaya nung Col. Prasant Singh Chunduwat nem asayartem metetdaksüba noksa nung angur.

Phek, Mongputeni/ October 25 (TYO): 38th Assam Rifles, Phek Battalion tawabangba kübok October 25 nü tetsür aser teburtem atema anogo pezü asoshi Inter School Football Tournament ka Assam Rifles ground nung tenzüko.

Iba asayamung ya Commandant Col. Prasant Singh Chunduwat-i tenzüka liasü aser October 28 nü

tembangsü. Assam Rifles sangdong ka ajanga ashiba agi, Phek jila, Losami yimtsüng, Phek yimtsüng aser Phek district kübok tesem balala nungi School 10 nungi tetsür aser tebur kaketshir 285-i iba asayamung nung shilem agidar.

Tetsür aser tebur asaya anaprongla nung takoker aser runners up team tem nem takok marok den senpet aser

asayadang amshiba oset balala agütsütsü, ta AR-isa metetdaksüogo.

Iba amala mesükba asayamung tang mezüngbuba district nung ayongzüka asayar aser Assam Rifles-i sentong tajung ayongzüka atema school tesayurtem aser kaketshirtemi kanga pelaba lemsatepa den tarutsü nunga iba amala sentong tajung ayongzüka katsütsü mepeshia liasü.

Iba asayamung ya nüburtem aser kaketshirtem, parnok taküm nung physical fitness aser asaya ya shilem ka kümdaksütsü nükjidong nung ayongzüko, koba ajanga parnok yimayimpong meleshia aoba nung teyari agütsütsü aser iba den parnok taküm nung pei sasa dak tali temulung lemteta kümdaksütsü.

Israel-i tayimtsü amshia...

Amakba sülen Israel nunger tayimtsü nungi leaflets tsükdaksü aser yangji Syrian army aser Palestinian factions dang Israel tsütsü rockets meyoktsü tekumgangsü shia liasü, ta Deraa province nung alirtemi ashi.

"Iba operation atema Syrian commander tai lir... Syrian litsü nungi rocket khaloktsü. Israel amaker tem yin agi yangluba teka achitsü," ta leaflets nung zülua liasü.

Deobarnü Israel nungeri tayimtsü amshia Syria nung airport tongtiba ana, Damascus aser Aleppo maka service makai akum ta Syrian state media ajanga shia liasü.

Gaza Strip nung yimsü asüba Hamas teloki October 7 nü Israel south tsütsü jila balala maka nisung 1,400 shi tepseter ano nisung 220 dak tema pua bener aoba sülen Israel-i Gaza nung tayimtsü amshia bomb poklokja arur.

Israel-i tayang kepzüka tayimtsü amshia bomb poklokja arudang nisung 5,791 tepsetogo ta Gaza nung aliba ketdangsür temi ashir. Iba den külemi tesem ajaklen lungbanga aliba tesem,

Gaza nungya ali, tzüyim aser anünglen tesem ajungalen tenokdangba agüja lir.

Syria nung küm ter dak tema rara arudang Israel-i north tsütsü kidanger linük nung Hezbollah fighter aser Iran-i yariba sepaitem aser Syrian army dak tenük yokter noklang aiben tayimtsü amshia maka arudagi.

Israel-i par jurila Syria nung amakba indang kangabo mejembir, saka par tsükchir Iran, kobai Tir Bashar al-Assad sorkar bhukumer, parnok tashi tuluba mekumgangsütsü ta aiben shia arur.

1967 rara nung Israel-i Golan Heights tuluba rakzüker aser mapang tatsüka lir tanüngba tesema agi, saka United Nations-i kodanga magizük.

Kasa mapang Palestinian militant groups Hamas aser Islamic Jihad ketdangsür temi Hezbollah lenir Hassan Nasrallah den senden mena Israel den raraba nung shidakba takok angutsü asoshi jembia liasü, ta Hezbollah teloki Bodhbarnü sangdong ka nung ashi.

(Tapak 7 nungi...)

Hezbollah sangdong nungya Nasrallah-i kodang aser kong Hamas number two Saleh al-Aruri aser Islamic Jihad lenir Ziad Nakhleh den ajurutepar mashi saka parnok Lemabon nung ajurutep ta ashi.

Hezbollah aser parnok den sendaktepa aliba Palestinian telungpur temi anogoshi Lebanon-Israel arütsülen Israel army tem den khatpeba mapang iba senden amenba osang ya arur.

Telok asem ya "axis of resistance" nung shilem ka lir - Palestinian, Lebanese, Syrian aser Israel anemba aser Iran-i yariba danga telungpur teloktem.

Gaza aser Palestine nung shidakba takok angutsü asoshi aser Israel-i tashiyim amshiba anendaksütsü atema tang tongtipang tensa nung axis of resistance ajanga kechi inyaksüla, item indang parnok jemi, ta sangdong ajanga ashi.

Parnoki October 7 nü Hamas-i Israel amakdang civilian 1,400 dak tema tepsetba aser Gaza Strip nung "Operation Al-Aqsa Flood" indanga jembia liasü.

Men's U23 State A Trophy atema Nagaland team sangdongogo



Dimapur, Mongputeni/ October 25 (TYO): Men's U23 State A Trophy 2023-24 atema Nagaland Cricket Association-i Men's U23 team sangdongogo.

Team nung asayartem yamai alitsü:

1. Hiketo Aye (C)
2. Hem Bahadur Chetri
3. Tohuka Zhimo
4. Shamphri Terang 5
5. Neizekho Rupreo
6. Mughavi Sumi
7. Raja Swarnkar
8. Zipa Pohen
9. Arhun Kumar Yadav
10. Odilemba Kichu
11. Keduowhetuo
12. Sujal Prasad
13. Samuel Zaputou
14. Thejasilie Savino
15. Zhalirtuo Keditsu

Support staff

1. Vikuonyu Solo- Team manager
2. VVV Apparao- Head coach
3. Keneizetso Medom- Asst. coach
4. Yoga Trinath- S&C coach
5. Krishna Prabhu- Physio

Fixture:

- 28th Oct. 2023: Nagaland vs Kerala
 - 30th Oct. 2023: Nagaland vs Pondicherry
 - 1st Nov. 2023: Nagaland vs Maharashtra
 - 5th Nov. 2023: Nagaland vs Karnataka
 - 7th Nov. 2023: Nagaland vs Punjab
 - 9th Nov. 2023: Nagaland vs Himachal Pradesh
- Asaya ajak Dehradun nung dang asayatsü.

11buba Phom Monyu Open Volleyball Tournament tenzüko



Dimapur, Mongputeni/ October 25 (TYO): Longleng Town Students' Union (LTSU)-i ayongzüka 11buba Phom Monyu Open Volleyball Tournament (PMOVT) October 24 nü public ground, Longleng nung tenzüko.

Iba asayamung nung alakteta jaoker PA to DC Longleng Y. Shingli Phom liasü. Taküm iba asayamung ya "Grit, Geeta, Glory" omen nung ajemdaker asayadaki.

Asayamung lapokba sentong nung o jembiba mapang Y. Shingli Phom-i sportsmanship koda tongtibang iba dak rangloker jembia liasü. Pai, asayartem dang temesepba mozü achiba aser yi ajemba nungi pila alitsü ajungshi. Paisa, sentepa alirtem dang lokti nung temesepba mozü amshiba nokdangsü atema teka amteper kati ka nem teyari agütsütepa inyaksangshitsü ajungshia liasü.

Asayamung lapokba sentong nung taoba tir O. Phomngai Mukho-i, aluruba sülen amungba benjung nungdem nung iba amala sentong tajung ayongzüka agiba atema pai tang tinyakdak aliba LTSU executive nem tenüngsang agüja liasü. Paisa, iba asayamung tenzüka indang lemsatepa den asayamung nung shilem agirtem dang chichiba asayar ka ama shilem agitsü ajungshia liasü.

Sentong nungsa Matmei Phom-i ken tajung ka aten aser S. Longnyei Buchem lenisüba nung asayartem tenangzüktepa agia liasü.

Iba sentong ya Bingmei Phom lenisüba nung agi aser LTBC assistant to women Ministry Chingkhong E. Phom-i Tsüngrem temoatsü meshizüka sarasademba den LTSU tir A. Angmaü Phom-i lokti pela agizükba o jembia liasü.

BILEMDANGANG
 "Tangar den memedemdangi pei-i kechi inyaktetsü aji jangjatsü merangang. "